

## **GARIS PANDUAN BEDAH SIASAT MAYAT MENURUT PERSPEKTIF ISLAM**

**Muzakarah Jawatankuasa Fatwa MKI Kali Ke-65  
13 Oktober 2004**

### **TUJUAN**

Garis panduan ini disediakan untuk dijadikan panduan kepada pengendalian bedah siasat, pengamal undang-undang, polis dan mereka yang berkenaan dalam pengendalian bedah siasat mayat.

### **PENGENALAN**

Sejarah perubatan telah mencatatkan bahawa bedah siasat atau post mortem ke atas mayat, atau dengan lain perkataan ilmu perubatan forensik mula diperkenalkan dari Negara Arab, kemudian berkembang ke Greek dan negara-negara barat seterusnya ke seluruh dunia. Perkembangan kemajuan sains perubatan dalam ilmu pembeداhan adalah berasaskan kepada keilmuan yang dibawa oleh Ibnu Sina. Perkembangan dari semasa ke semasa melalui kajian dan pengajian ahli sains perubatan, telah menghasilkan teknologi moden dalam ilmu bedah siasat mayat dengan cara lebih saintifik bagi mencari keadilan yang dikehendaki.

Pada abad ke 21 ini, bedah siasat mayat merupakan satu perkara yang tidak dapat dielakkan dan bukan asing di kalangan umat Islam. Ini kerana ia adalah tindakan yang perlu diambil dan dilakukan untuk kepentingan masyarakat seperti untuk menyelesaikan kes-kes jenayah atau bukan kes jenayah serta kajian dalam bidang perubatan. Walaubagaimana pun dalam urusan bedah siasat mayat, Islam telah menetapkan beberapa garis panduan yang perlu diikuti supaya tidak timbul percanggahan antara tuntutan syarak dengan amalan yang dilakukan dalam bidang perubatan.

## **KEPUTUSAN FATWA**

Muzakarah Jawatankuasa Fatwa Kebangsaan kali ke-25 yang bersidang pada 13 Disember 1989 telah memutuskan:

***“Pembedahan mayat orang Islam hanya boleh dilakukan jika keadaan benar-benar memerlukan (dharurat) sahaja seperti terlibat di dalam kes-kes jenayah yang sangat memerlukan post mortem atau si mati tertelan benda yang berharga atau si mati yang sedang mengandung sedangkan kandungannya masih hidup”.***

Muzakarah Jawatankuasa Fatwa Kebangsaan kali ke-61 yang bersidang pada 27 Januari 2004 dalam membincangkan mengenai hukum bedah siasat mayat yang kematian bukan dikategorikan kes jenayah telah memutuskan:

***“Hukum asal pembedahan mayat adalah haram tetapi dibolehkan sekiranya dalam keadaan dharurat dan terdapat keperluan yang mendesak seperti membuat kajian terhadap penyakit, mengenalpasti punca kematian dan penyelidikan serta pendidikan khususnya dalam bidang perubatan”.***

## **AMALAN BEDAH SIASAT MAYAT**

### **Definisi Bedah Siasat Mayat**

‘Bedah siasat’ atau dalam istilah bahasa Inggeris disebut *post-mortem* bermaksud suatu pemeriksaan yang dijalankan oleh Pegawai Perubatan Kerajaan ke atas mayat. Ianya melibatkan pemeriksaan luaran dan dalaman untuk mengenalpasti punca kematian dan ciri atau setakat mana perubahan dihasilkan oleh sesuatu penyakit, kimia, radiasi, kemalangan, kecederaan dan lain-lain.

### **Objektif Bedah Siasat Mayat**

Pembedahan yang dilakukan ke atas mayat mempunyai objektif-objektif tertentu di antaranya:

1. Untuk mengesahkan identiti si mati.
2. Untuk mengenalpasti sebab kematian.
3. Untuk mengetahui punca, cara dan masa kematian.
4. Untuk menghilangkan keraguan mengenai sebab kematian.
5. Untuk menunjukkan penyakit dan kecacatan.
6. Untuk mengesan, menggambarkan dan mendokumenkan penyakit dan kecederaan luar serta dalam.
7. Mendapatkan sampel untuk dikaji seperti kajian kuman, tisu abnormal dan lain-lain.
8. Untuk mengambil gambar dan rakaman video bagi tujuan bukti/barang kes.
9. Untuk menyediakan laporan bertulis yang lengkap tentang penemuan dalam pemeriksaan mayat.
10. Untuk memberi perkhidmatan pakar tentang interpretasi penemuan semasa pemeriksaan mayat.
11. Untuk memulih semula keadaan mayat yang cedera teruk sebaik mungkin sebelum diserahkan kepada waris.
12. Untuk pengajian akademik, menjalankan kajian dan penyelidikan dalam bidang perubatan.
13. Untuk meningkatkan kepakaran.
14. Untuk membuat kajian rawatan sesuatu penyakit.
15. Untuk keperluan undang-undang.

## Jenis-Jenis Bedah Siasat Mayat

### 1. Bedah siasat klinikal

Bedah siasat ke atas mayat bagi menge Sahakan punca kematian, kesan sesuatu penyakit atau kecederaan serta bagi tujuan pembelajaran dan penyelidikan. **Kes-kes kematian ini tidak berkait dengan kes Polis** seperti kes penyakit mudah berjangkit atau kematian di wad. Pegawai Perubatan Kerajaan **perlu mendapat keizinan dari waris** sebelum membuat bedah siasat. Dalam kes-kes yang melibatkan kepentingan umum seperti kes di bawah Akta Pencegahan Dan Kawalan Penyakit Berjangkit 1988 (Akta 342), bedah siasat dibolehkan tanpa perlu merujuk atau mendapat keizinan waris.

## **2. Bedah siasat *medicolegal***

Bedah siasat ke atas mayat yang dikaitkan dengan kes Polis seperti kemalangan, mati lemas, kebakaran, pembunuhan dan kematian yang disyaki/tidak pasti sebabnya. Majistret atau Polis akan mengeluarkan arahan (Borang Pol. 61) kepada Pegawai Perubatan Kerajaan untuk menjalankan bedah siasat ke atas mayat **tanpa perlu merujuk atau mendapat keizinan waris.**

### **Keperluan Bedah Siasat Mayat**

1. Bedah siasat dilakukan kerana ia keperluan undang-undang untuk membuktikan kebenaran dan menegakkan keadilan bagi si mati dan waris.
2. Bedah siasat dapat mengelakkan perkara yang tidak diingini yang timbul di masa hadapan setelah mayat dikebumikan.
3. Hasil bedah siasat dapat digunakan bagi menyelamatkan dan melindungi orang ramai daripada penyakit berjangkit yang berbahaya pada masa akan datang.
4. Bedah siasat dapat menambah ilmu dan kepakaran dalam bidang perubatan.
5. Kajian daripada hasil bedah siasat dapat meningkatkan tahap kesihatan dan keharmonian hidup masyarakat.

### **Kematian yang perlu bedah siasat**

Selain bedah siasat mayat yang dibenarkan mengikut keputusan Muzakarah Jawatankuasa Fatwa Kebangsaan, terdapat juga kematian yang perlu kepada bedah siasat mengikut peruntukan undang-undang dan arahan Kementerian Kesihatan Malaysia yang selaras dengan kehendak syarak (dharuriat dan hajiyat) iaitu:

#### **1. Kes kematian *medicolegal***

- a. Semua kematian yang mendadak luar biasa, disyaki bukan kes-kes biasa, akibat perlakuan ganas seperti bunuh.
- b. Kematian mendadak biasa tetapi tidak diketahui sebab kematian dari segi perubatan.

- c. Kematian akibat kemalangan menggunakan kenderaan.
- d. Kematian di tempat kerja;kemalangan, penyakit dan keracunan di tempat kerja.
- e. Kematian akibat keracunan. (*e.g. alcohol intoxication, coal gas, insecticides, barbiturates etc*).
- f. Kematian akibat bunuh diri.
- g. Kematian akibat penggunaan gas-gas perubatan semasa pembedahan, prosedur penyiasatan perubatan, peralatan dan teknologi yang digunakan oleh hospital/klinik dan sebagainya.
- h. Kematian akibat kemalangan di rumah, hospital/ institusi/ tempat umum.
- i. Kematian akibat kecuaian pegawai dan kakitangan hospital/klinik seperti kecuaian menggunakan prosedur perubatan, peralatan, ubat, rawatan dan sebagainya.
- j. Kematian tahanan polis, tahanan reman, banduan di kem-kem tahanan.
- k. Kematian di Institusi Mental, rumah sakit jiwa dan lain-lain.
- l. Kematian bayi baru lahir yang dijumpai.
- m. Kematian kanak-kanak akibat kelemasan (*suffocation*) nafas.
- n. Kematian berkaitan anak-anak angkat.
- o. Sebarang kematian akibat kebakaran dan letupan.
- p. Mati lemas.
- q. Sebarang kematian di luar kawasan kediaman seperti di tepi jalan, dalam sungai, perairan dan sebagainya, di mana kediaman si mati tidak diketahui.
- r. Kematian akibat dari bahan-bahan kimia dan radiasi perindustrian seperti toksid, asid, radioaktif dan sebagainya.

## 2. Kes kematian klinikal

- i. Kematian akibat penyakit berjangkit seperti Sindrom Pernafasan Akut Yang Teruk (SARS), AiDS, Anthraks, Japanese Encephalitis (JE) dan seumpamanya.
- ii. Kematian di wad yang diketahui sebabnya tetapi memerlukan maklumat lebih lanjut mengenai sebab kematian.
- iii. Kematian ibu semasa mengandung (*maternal death*).

## **Prosedur Bedah Siasat Mayat**

1. Kebenaran bagi menjalankan bedah siasat mayat tertakluk kepada:
  - i. Arahan Majistret atau Polis bagi kes-kes kematian medicolegal.
  - ii. Arahan Ketua Pengarah Kesihatan bagi kes-kes tertentu seperti penyakit berjangkit atas kepentingan umum.
  - iii. Mendapatkan kebenaran dan keizinan bertulis dari waris bagi kes-kes bedah siasat klinikal.
2. Bedah siasat ke atas mayat hanya boleh dijalankan di hospital-hospital Kerajaan atau tempat lain yang sesuai (Seksyen 330 Kanun Acara Jenayah).
3. Bedah siasat mayat hanya boleh dijalankan oleh Pegawai Perubatan Kerajaan sahaja.

## **Proses Bedah Siasat Mayat**

### 1. Pemeriksaan luaran

Menjalankan pemeriksaan luaran untuk mendokumentasi kecederaan mayat. Pegawai Perubatan Kerajaan akan membuat pemeriksaan terperinci ke atas mayat antaranya pakaian si mati, keadaan mayat secara keseluruhan, perubahan-perubahan luaran yang berkaitan dengan kematian dan penyakit serta tanda-tanda kecederaan. Sekiranya sebab kematian dapat dikenalpasti, maka pembehdahan mayat tidak lagi perlu dilaksanakan.

### 2. Pemeriksaan dalaman

Sekiranya pemeriksaan luaran masih tidak dapat mengenalpasti punca kematian, maka pemeriksaan dalaman perlu dijalankan. Ini termasuklah membuka tempurung kepala, rongga dada, abdomen, pelvis dan lain-lain bila mana perlu.

### 3. Pengambilan Spesimen iaitu mengambil cecair badan untuk analisis toksikologi dan lain-lain ujian seperti pemeriksaan radiologi, kaji kuman, kajian tisu dan fotografi forensik.

## ETIKA BEDAH SIASAT MAYAT

Dalam urusan bedah siasat mayat perlu memenuhi etika yang digariskan oleh syarak iaitu:

### **Menghormati, menjaga hak dan kemuliaan mayat sebagai manusia**

Semua Pegawai dan Petugas Perubatan Kerajaan yang terlibat dalam proses bedah siasat hendaklah menghormati mayat seperti manusia yang masih hidup. Islam menyuruh orang yang masih hidup supaya menjaga kemuliaan, hak-hak dan kehormatan orang yang telah mati sepetimana orang hidup tanpa mengira bangsa, agama dan keturunan. Islam melarang seseorang menganiayai seseorang yang lain sama ada pada diri, maruah dan harta mereka.

Firman Allah S.W.T.;

﴿وَلَقَدْ كَرِمْنَا بَيْنَ أَدَمَ وَحَمَلْنَاهُمْ فِي الْبَرِّ وَالْبَحْرِ وَرَزَقْنَاهُمْ مِنَ الطَّيِّبَاتِ  
وَفَضَّلْنَاهُمْ عَلَىٰ كَثِيرٍ مِمْنُ خَلْقِنَا تَفْضِيلًا﴾

*Maksudnya: "Dan sesungguhnya Kami telah memuliakan anak-anak Adam; dan Kami telah beri mereka menggunakan berbagai-bagai kendaraan di darat dan di laut; dan Kami telah memberikan rezeki kepada mereka dari benda-benda yang baik-baik serta Kami telah lebihkan mereka dengan selebih-lebihnya atas banyak makhluk-makhluk yang telah Kami ciptakan".*

(Surah al-Israa' :70)

### **Menyegerakan urusan bedah siasat mayat**

Urusan bedah siasat mayat hendaklah dijalankan dengan segera supaya selaras mengikut kehendak syarak yang mewajibkan mayat diuruskan dengan segera, sebagaimana hadis yang diriwayatkan dari Abu Hurairah r.a. berkata:

Rasulullah s.a.w bersabda:

((أَسْرِعُوا بِالْجَنَازَةِ فَإِنْ تَكَ صَالِحةٌ فَخَيْرٌ تَقْدُمُونَهَا عَلَيْهِ وَإِنْ تَكَ غَيْرُ ذَلِكَ فَشُرٌّ  
تَضْعُونَهُ عَنْ رَقَبِكُمْ ))  
(رواه مسلم)

*Maksudnya: "Seggeralah penyelesaian pengurusan jenazah kerana kalau ia jenazah orang soleh maka bererti kamu menyegerakan kepada kebaikan dan apabila sebaliknya (mayat yang tidak soleh) maka bererti kamu telah melepaskan kejahatan dari bahumu".*

*(Riwayat Muslim)*

### **Kebenaran Waris**

1. Bagi kes-kes klinikal (clinical post mortem), Pegawai Perubatan Kerajaan perlu mendapat kebenaran daripada waris untuk melakukan bedah siasat.
2. Bagi kes-kes *medicolegal post mortem* kebenaran dari waris tidak diperlukan untuk melakukan bedah siasat.

### **Memulakan bedah siasat mayat dengan membaca بسم الله**

Pegawai dan Petugas Perubatan Kerajaan yang beragama Islam hendaklah memulakan tugas menjalankan bedah siasat mayat dengan membaca بسم الله

Sabda Rasulullah saw:

((كُلُّ أَمْرٍ ذِي بَالٍ لَا يَبْدأُ فِيهِ بِاسْمِ اللَّهِ فَهُوَ أَبْتَرُ))  
(رواه السبكي)

*Maksudnya: "Setiap urusan yang mempunyai tujuan yang tidak dimulai dengan bismillah dianggap terputus"*

*(Riwayat al-Subki)*

### **Mengucapkan *al-hamdu lillah* selepas selesai tugas bedah siasat mayat**

Pegawai dan Petugas Perubatan Kerajaan yang beragama Islam hendaklah mengakhiri tugas bedah siasat mayat dengan mengucapkan *al-hamdu lillah*, semoga tugas yang dilaksanakan mendapat keredhaan dan kerahmatan daripada Allah S.W.T.

### **Melakukan bedah siasat dengan cermat (tidak kasar)**

Pembedahan hendaklah dilakukan dengan cara cermat supaya tidak

merosakkan kehormatan dan kemuliaan mayat.

Hadis Rasulullah s.a.w:

عن عائشة ، رضي الله عنها ان رسول الله صلى الله عليه وسلم قال: (( كسر عظم الميت، كسره حي ))  
(رواه ابو داود)

*Maksudnya: Dari Aisyah r.a., Rasulullah s.a.w. bersabda; “Memecahkan/mematahkan tulang mayat sama seperti memecahkannya/mematahkannya sewaktu hidupnya”.*

(Riwayat Abu Daud)

### **Menjalankan bedah siasat mayat dalam suasana tenang**

Sewajarnya pembedahan mayat dilakukan dalam suasana yang tenang dan tidak ada gangguan bunyi bising bagi menghormati dan memuliakan mayat.

### **Menjaga had bedah siasat mayat berdasarkan *dharuriyat* (keadaan mendesak) dan *hajiyat* (keperluan)**

*Dharuriat* dan *hajiyat* menjadi sebab untuk mengharuskan tindakan bedah siasat ke atas mayat. Islam menolak perkara yang boleh membawa kemudarat sebaliknya mengharuskan perkara yang mendatangkan kebaikan. Setiap tindakan untuk menghindarkan kemudarat adalah suatu suruhan dan galakan serta bersesuaian dengan matlamat Islam iaitu untuk menjaga dan memelihara maslahah kehidupan. Ini berdasarkan kepada hadis Rasulullah s.a.w.:

(( لا ضرر ولا ضرار ))  
(رواه ابن ماجه)

*Maksudnya: “Tiada mudharat dan tidak boleh memberi kemudharatan (kepada orang lain)”.*

(Riwayat Ibnu Majah)

Selain itu menurut kae dah fiqhiiyah juga menyebut bermaksud “perkara-perkara yang *dharurat* mengharuskan perkara-perkara

*yang dilarang* ". Bedah siasat mayat tanpa sebab dharurat dan hajiyat adalah dilarang dalam Islam kerana perbuatan tersebut menganiayai mayat.

### **Melakukan bedah siasat mayat setakat yang diperlukan sahaja**

Bedah siasat mayat yang dilakukan tidak boleh melampaui batas atau had *rukhsah* yang dibenarkan kerana mengambil kira hukum asal menyakiti mayat adalah haram. Oleh itu, bedah siasat mayat boleh dilakukan ke atas mananya anggota mayat yang diyakini boleh membantu mencapai matlamat pembedahan dan mengenalpasti sebab-sebab kematian. Ini bersesuaian dengan kaedah fiqhiyyah *الضرورات تقدر بقدرها* iaitu "perkara dharurat adalah dikira mengikut kadarnya".

### **Menjaga aurat mayat**

Orang yang melakukan bedah siasat mayat hendaklah tidak boleh dengan sengaja melihat aurat mayat kecuali pada kadar yang diperlukan sahaja. Diriwayatkan dari Saidina Ali k.m.j., Rasulullah s.a.w. bersabda:

(( لا تبرز فخذك ولا تنظر الى فخذ حي ولا ميت ))  
(رواه ابو داود وابن ماجه)

*Maksudnya : "Janganlah kamu nyatakan (perlihatkan) pahamu, dan janganlah kamu memandang kepada paha orang hidup dan orang mati".*

*(Riwayat Abu Daud dan Ibnu Majah)*

Mayat seboleh-bolehnya diuruskan oleh petugas dari jantina yang sama. Kaedah ini merujuk kepada keputusan Persidangan Majma' al-Fiqh al-Islami (Islamic Fiqh Academic) di Brunei Darussalam pada 21-27 Jun 1993 mengenai wanita yang ingin mendapatkan rawatan perlu mengikuti keutamaan berikut;

- i. Doktor perempuan muslim pakar
- ii. Doktor perempuan bukan muslim pakar
- iii. Doktor lelaki muslim pakar
- iv. Doktor lelaki bukan muslim pakar

Islam mengharuskan rawatan lelaki terhadap perempuan dan sebaliknya dengan syarat-syarat seperti berikut:

- i. Tidak bersendirian
- ii. Menahan pandangan mata
- iii. Menyentuh di tempat yang berkaitan
- iv. Menyediakan doktor pakar mengikut jantina

### **Menjaga rahsia mayat**

Pegawai dan Petugas Perubatan Kerajaan yang terlibat dalam bedah siasat mayat hendaklah menyimpan rahsia mayat, iaitu tidak mengaib dan tidak mendedahkan keadaan mayat kepada pihak yang tidak berkenaan.

### **Tidak menghina, mencemuh dan memaki mayat**

Pegawai dan Petugas Perubatan Kerajaan yang terlibat dalam pengendalian mayat tidak boleh menghina, mencemuh atau memaki mayat.

Hadis Rasulullah s.a.w.:

عن ابن عمر ، قال : قال رسول الله صلى الله عليه وسلم : (( اذكروا محسن موتاكم، وكفوا عن مساویهم ))  
(رواه الترمذی)

*Maksudnya : "Dari Ibnu Umar telah berkata : Sabda Rasulullah s.a.w.: Sebutlah kebaikan orang yang telah mati dan berhentilah dari menyebut keburukan mereka".*

*(Riwayat at-Tirmizi)*

### **Menjaga Kebersihan**

Pegawai dan Petugas Perubatan Kerajaan yang menjalankan bedah siasat mayat hendaklah menjaga kebersihan diri, pakaian, peralatan dan tempat serta mayat sebelum, semasa dan selepas bedah siasat mayat.

### **Mengambil langkah-langkah keselamatan**

Pegawai dan Petugas Perubatan Kerajaan yang menjalankan bedah siasat mayat hendaklah mengambil kira langkah-langkah keselamatan terutamanya dalam pengendalian mayat yang berisiko.

## **Menguruskan mayat dan sampel kajian (organ atau tisu) selepas bedah siasat dengan sebaik-baiknya**

1. Anggota mayat yang dibedah hendaklah dijahit semula dengan kemas.
2. Semua organ atau tisu yang diambil untuk kajian hendaklah dikembalikan kepada mayat sebelum mayat disempurna dan dikebumikan.
3. Bagi kes yang memerlukan kajian dan penyelidikan ke atas sampel dari mana-mana anggota mayat yang memakan masa lama (di simpan bertahun-tahun dalam makmal) kerana kekurangan pakar, penyakit masih tidak dapat dikenalpasti, kekurangan alat dan sebagainya, maka jenazah hendaklah disempurna dan dikebumikan dahulu. Manakala organ atau tisu yang diambil untuk kajian seboleh-bolehnya dikembalikan kepada waris atau pihak bertanggungjawab.
4. Kajian dan siasatan ke atas sampel yang diambil hendaklah dijalankan dengan segera.

## **Tidak Mengambil Tisu atau Organ Mayat**

Pegawai dan Petugas Perubatan Kerajaan tidak dibenarkan mengambil mana-mana tisu atau organ daripada mayat yang dibedah siasat melainkan dengan kebenaran undang-undang. (Akta Tisu Manusia 1974-Akta 130).

## **Orang yang dibenarkan hadir semasa bedah siasat mayat**

Hanya petugas bedah siasat mayat dan pihak Berkuasa yang berkaitan sahaja dibenarkan berada di dalam bilik bedah siasat semasa bedah siasat dijalankan.

## **PERANAN JABATAN/AGENSI**

Jabatan/Agensi yang terlibat dalam urusan bedah siasat mayat hendaklah memastikan garis panduan ini dipatuhi. Agensi tersebut ialah Kementerian Kesihatan, Polis DiRaja Malaysia, Jabatan Kehakiman, Jabatan Peguam Negara, Jabatan Kimia, Jabatan Agama.

Bagi memastikan prosedur bedah siasat ini dilaksanakan dengan segera dan menepati kehendak syarak, perkara-perkara berikut perlu diberi perhatian:


1. Pegawai dan Petugas Perubatan Kerajaan yang terlibat dalam urusan bedah siasat mayat hendaklah memberi perhatian kepada peruntukan Seksyen 330 Kanun Acara Jenayah.
2. Pihak Kementerian Kesihatan atau pihak pentadbir hospital mestilah memberi keutamaan dalam urusan bedah siasat mayat supaya urusan pengendalian jenazah tersebut dapat disempurnakan.
3. Ketua-ketua Jabatan/Agensi yang terlibat dengan bedah siasat mayat hendaklah mengawasi pelaksanaan garis panduan ini supaya dipatuhi.

## **PENUTUP**

Penyediaan garis panduan ini merangkumi semua mayat tanpa mengira bangsa, keturunan dan agama. Mematuhi tuntutan syarak terhadap perkara-perkara yang berbangkit dari bedah siasat adalah suatu amanah yang wajib ditunaikan terutama bedah siasat yang melibatkan mayat orang Islam.


Aspek perlaksanaan bedah siasat mayat yang lebih dipengaruhi faktor perundangan melebihi aspek klinikal perlu diberi perhatian serius bukan sahaja oleh pengamal perubatan bahkan oleh penggubal polisi. Garis panduan ini memberi makna dan implikasi yang mendalam dan boleh membantu menyelesaikan banyak masalah dalam isu bedah siasat mayat pada masa ini dan akan datang.

## CARTA ALIRAN PENGURUSAN MAYAT DARI DALAM WAD



\* Sumber : SOP Jabatan Perubatan Forensik Hospital Kuala Lumpur

## CARTA ALIRAN PENGURUSAN MAYAT UNIT FORENSIK



\* Sumber : SOP Jabatan Perubatan Forensik Hospital Kuala Lumpur

## **SENARAI RUJUKAN**

### **Al-Quran**

1. Al-Quran. Tafsir Pimpinan Rahman. Darul Fikir : 2000.

### **Al-Hadith**

2. Abi Daud Sulaiman. *Sunan Abi Daud*. Darul al-Hadith. Kaherah.
3. Ahmad bin Ali. *Fathu al-Baari Syarh Sahih al-Bukhari*. Dar al-Salam. al-Riyadh.

### **Al-Kitab**

4. Said Ibrahim. *Manhaj Utum Fiqh*. Darul Makrifah. Kuala Lumpur. 1997.
5. Ahmad bin Muhammad al-Zarqa. *Syarh al-Qawaaid al-Fiqhiyyah*. 1989. Dar al-Qalam.
6. Muhamad Hasan bin Muhamad Hasan Ismail as-Syafie. *al-Ashbaah wa an-Nazoir*. 1998. Dar al-Kitab al-A'lamiah.
7. Yusuf al-Qardawi, *al-Halal wal Haram fi al-Islam*, 1994. al-Maktab al-Islami. Beirut.

### **Pekeliling & Garis Panduan**

8. Surat Pekeliling Ketua Pengarah Kesihatan Bil. 10/1986. Garis Panduan Post Mortem Mayat Orang Islam.
9. Guidelines For Clinical Pathology Services. Jabatan Patologi Hospital Kuala Lumpur. 1996.
10. Surat Pekeliling Pengarah Perkhidmatan Perubatan Bil. 4/1986. Peraturan-Peraturan Bagi Menjalankan Medicolegal Post Mortem.

11. Peraturan-Peraturan Bagi Pengurusan Mayat-Mayat Di Hospital-Hospital. Bahagian Perkhidmatan Perubatan. Kementerian Kesihatan Malaysia. 15 Ogos 1983.
12. Memoranda Di Atas Pembedahan Mayat-Mayat Orang-Orang Islam. Kementerian Kesihatan Malaysia bertarikh 8 November 1965.

#### **Undang-Undang**

13. Kanun Prosedur Jenayah Bab 32. Panduan Undang-undang Jenayah, Bahagian VII Prosiding Khas, Bab XXXII Siasatan Kematian. Seksyen 328-341A. Mac 1994.
14. Akta Tisu Manusia 1974-Akta 130.
15. The Colonial Process: A 21<sup>st</sup> Century Perspective. Unit Pembaharuan Undang-undang, Jabatan Peguam Negara. 2003

#### **Muzakarah Jawatankuasa Fatwa Kebangsaan**

16. Kertas Muzakarah Jawatankuasa Fatwa Kebangsaan Kali Ke-25. **Bedah Siasat Ke Atas Mayat.** 1989
17. Kertas Muzakarah Jawatankuasa Fatwa Kebangsaan Kali Ke-61. **Bedah Siasat Ke Atas Mayat Yang Bukan Dikategorikan Kematian Kerana Kes Jenayah.** 2003.

#### **Kertas Kerja**

18. Japar Maidin. ***Bedah Siasat (Post-Mortem) Mayat: Satu Tinjauan Menurut Perspektif Syarak.*** Jabatan Mufti Kerajaan. Jabatan Perdana Menteri. Brunei Darussalam.
19. ***Abdul Manan Ismail, Irwan Mohd Subri. Etika Kedoktoran Menurut Perspektif Islam.*** Kolej Universiti Islam Malaysia. 2003.

- 
20. Abdul Manan Ismail, Irwan Mohd Subri. *Rawatan Lelaki Terhadap Perempuan dan Sebaliknya Menurut Fiqh*. Kolej Universiti Islam Malaysia. 2003
  21. Ismail Ibrahim. *Islam dan Pemindahan Organ*. 1999. Perniagaan Normahs.

#### **Laman Web**

22. Abdullah Fakih. *Hukum Bedah Siasat Mayat Untuk Tujuan Pendidikan*. Islamweb.Net.
23. Abdullah Fakih. *Hukum Memutup Aurat Mayat Semasa Pembedahan*. Islamweb.net.

#### **DAFTAR ISTILAH**

1. Dharuriat - Suatu keadaan yang mana tiada cara atau jalan lain untuk menyelesaikan perkara tersebut melainkan terpaksa melakukan perkara tersebut.
2. Hajiyat - Keperluan bagi tujuan memudahkan hal-hal dharuriat.
3. Rukhsah (Kemudahan) - Rukhsah bermaksud hukum-hukum yang telah disyariatkan oleh Allah S.W.T berdasarkan kepada keuzuran seseorang hamba kerana menjaga hajat mereka serta berkekalan sebab yang mewajibkan hukum asal.
4. Etika - Etika bermaksud ilmu berkenaan prinsip-prinsip akhlak atau moral yang menjadi pegangan seseorang individu atau sesuatu kumpulan.
5. Interpretasi - Tafsiran, penjelasan (tentang makna, tujuan, implikasi).
6. Subklavikular - bawah tulang selangka.